

ՀԱՆՐԱՅԻՆ ՔՆՆԱՐԿՈՒՄ

2019 թվականի մարտի 26-ին Արմավիրի համայնքապետարանի նիստերի դահլիճում տեղի ունեցավ հանրային քննարկում՝ 2019 թվականի սուբվենցիոն համաֆինանսավորման ծրագրով Արմավիր քաղաքի Մյասնիկյան փողոցի Չարենցի փողոց-Ջիվանու փողոց հատվածի և Սայաթ-Նովա փողոցի Հանրապետության փողոց-Ջիվանու փողոց հատվածի երթևեկելի մասի, մայթերի և ջրահեռացման համակարգի ամբողջությամբ հիմնանորոգման և ասֆալտապատման հարցի վերաբերյալ:

Քննարկմանը մասնակցում էին համայնքի բնակիչներ, համայնքի բնակիչ՝ ԱԺ պատգամավոր Է. Անդրեասյանը, ավագանու անդամներ, ՀԿ ներկայացուցիչներ, ՋԼՍ ներկայացուցիչներ, համայնքապետարանի աշխատակիցներ:

Համայնքի ղեկավարի տեղակալ Խ. Մկրտչյանը հանրային քննարկման մասնակիցներին ներկայացրեց 2019 թ. սուբվենցիոն համաֆինանսավորման ծրագրով ներկայացված վերը նշված հայտի վերաբերյալ մանրամասներ:

Նա նշեց, որ ՀՀ Տրանսպորտի, Կապի և Տեղեկատվական Տեխնոլոգիաների նախարարության կողմից դիտողություններ և առաջարկություններ չեն արձանագրվել, սուբվենցիայի հայտը և տեխնիկական բնութագիրը քննարկվել է ոլորտային պետական կառավարման մարմնի հետ:

Այնուհետև ծավալվեց բուռն քննարկում: Մասնավորապես ներկաներից հարցեր բարձրացրեցին թե ինչու հատկապես այդ ճանապարհահատվածներն են ներկայացվել ծրագրով, ինչու ծայրամասերից չեն ընտրվել փողոցներ:

Խ. Մկրտչյանը նշեց, որ հայտի նախնական քննարկում ավագանու անդամների հետ տեղի է ունեցել:

Նա փաստեց, որ համայնքի հնգամյա զարգացման ծրագրով ներկայացված են համայնքի հիմնախնդիրները և հնարավոր ցանկացած միջոցի առկայության դեպքում, ըստ առաջնայնության պետք է լուծումներ տրվեն:

Տվյալ հայտով ներկայացված ճանապարհահատվածների հիմնանորոգման անհրաժեշտությունը բազմաթիվ կարևորագույն հիմնավորումներ ունի:

Այն, որ այդ հատվածներում տեղակայված են հանրակրթական դպրոց, մանկապարտեզ, բանկ, ոստիկանության համակարգի կառույցներ, բազմաբնակարան բնակելի շենքեր և բազմաթիվ հանրային նշանակության սպասարկման օբյեկտներ: Կարևորվել է նաև այն կարևորագույն հանգամանքը, որ տարիներ շարունակ ազգաբնակչության կողմից բարձրացվել է այս հատվածների ոչ միայն անանցանելի ճանապարհների խնդիրը այլ նաև ջրահեռացման համակարգի ապահովումը:

Խ. Մկրտչյանը նշեց, որ փաստաթղթերի ամբողջացման այս փուլում է նախատեսվում հանրային քննարկումը, որից հետո հարցը պետք է քննարկվի նաև ավագանու առաջիկա նիստում:

Վերջում ներկաները կարևորեցին նման հանրային լուծումները, քննարկումները, որոնք վերհանում են հասարակական կարծիքը և կարևորում հետագա հետևողական բաց գործելաոճը՝ ի շահ ազգաբնակչության և համայնքի առջև ծառայած խնդիրների լուծման:

Քննարկումն առցանց հեռարձակվում էր, որն ապահովում էր հանրության անմիջական մասնակցությունը հանրային քննարկմանը: